

**Inuit biilii biilillu assartuutit innaallagissamik brintimillu ingerlatillit  
eqqunneqarneranni nioqqutissanik eqqussuinermi akitsuummik aamma qamutit  
motorillit akileraarutaannik akiliinngikkallarnissamik Inatsisartut inatsisaattut  
siunnersuut**

*Aningaasaqarnermut Nunamullu Namminermut Naalakkersuisumit saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**ISUMALIUTISSIISSUTAA**

**Siunnersuutip aappassaaneerreqarnissaanut saqqummiunneqartoq**

Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Finn Karlsen, Siumut, siulittaasoq  
Inatsisartunut ilaasortaq Gerhardt Petersen, Atassut, siulittaasup tullia  
Inatsisartunut ilaasortaq Evelyn Frederiksen, Siumut  
Inatsisartunut ilaasortaq Jens Imanuelsen, Siumut  
Inatsisartunut ilaasortaq Kalistat Lund, Inuit Ataqtigiit  
Inatsisartunut ilaasortaq Hans Aronsen, Inuit Ataqtigiit  
Inatsisartunut ilaasortaq Naaja Nathanielsen, Inuit Ataqtigiit

Ulloq 24. september 2013-imi siullermeerinerup kingorna siunnersuut ataatsimiititaliamit misissorreqarpoq.

**Siunnersuutip imarisaa siunertaalu**

Inatsisissatut siunnersuutip kinguneraa inuit biiliisa biilillu assartuutit kiisalu nutaatut biilit usisaatillit bussillu innaallagissamik brintimillu ingerlatillit eqqunneqarneranni nioqqutissanik eqqussuinermi akitsuummik aamma qamutit motorillit akileraarutaannik 1. januar 2018-ip tungaanut ukiuni sisamani akiliinngikkallarnissaat.

**Siunnersuutip Inatsisartunit siullermeerneqarnera**

Siunnersuutip siullermeerneqarnerani siunnersuut tapersorsorluarneqarpoq.

### **Tusarniaanermi akissutit**

Tusarniaanermi akissutit inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq. Tusarniaanermut ataatsimiititaliap annertunerusumik oqaaseqaatissaqanngilaq.

### **Ataatsimiititaliap siunnersuummik suliarinninnera**

Inuit biilii biilillu assartuutit innaallagissamik brintimillu ingerlatillit eqqunneqarneranni nioqutissanik eqqussuinermi akitsuummik aamma qamutit motorillit akileraarutaannik 2010-mili akiliuteqarfigineqarnej ajorput. Biilit hybridimik ingerlatillit akitsuummik akileraarummilu akiliisussaanninnermut ilaatinneqarsimanngillat. Tamatumunnga tunngavilersuutaasarsimavoq sulilu tunngavilersuutaalluni biilit hybridimik ingerlatillit tunngaviusumik isigalugu tassaammata “nalinginnaasumik” benzinatortut/dieselitortut/gassitortut inaallagiatortumik motorillit. Batterii innaallagiasqanngippat biili motorimit ikummatissamik ingerlateqartumik ingerlanneqalersarpoq. Taamaalillunilu tunngaviusumik isigalugu biilit hybridimik ingerlatillit ikummatissamik 100 %-imik atuilluni ingerlasinnaapput, taamaalillunilu avatangiisinut iluanaarutissaagaluaq annaaneqarluni.

Akitsuummik akileraarummillu akiliisussaanninnerup ukiunik sisamanik sivitsuinissamut taarsiullugu ataavartunngortinneqarnissaata kissaatigineqarnera siullermeerinermi saqqummiunneqarpoq.

Siunnersuummut nassuiaatini Naalakkersuisut ima allapput:

*”Qamutit motoorillit innaallagissamik brintimillu ingerlatillit maanna ineriartortikkiartuaarneqarneranniilli atugaaneruleriartornissaat, biilit innaallagissamik brintimillu ingerlatillit akitsuutaannik akileraarutaannillu akiliisitsinngikkallarnikkut periarfissagissaartinniarneqarpoq, tassuunakkullu aamma Kalaallit Nunaata CO2-mik aniatitsineranik tamarmiusumik millisitsissalluni. Akitsuutip biilit Kalaallit Nunaanni atugaaleriartornerat ilutigalugu naapertuunnerusumik angissusinikkiartuaartinneqarnissaa naatsorsuutaavoq. Biilini akitsuusiisarneq taassuma ilutigisaanik allannortikkiartuaarneqassaaq, qamutit motoorillit ataasiakkaat avatangiisinik mingutsitsinerat akitsuusiinermi isiginiarneqassalluni. Taamaattorli biilini akitsuusiisarnerup allannortinneqarnissaa tamatuminngalu suliaqarnissaa allatigut ineriartortitsiniarluni nutarteriniarlunilu sulinissamut piviusunngortitsinissamullu ataqatigiissaarneqassapput.”(ataatsimiititaliap erseqqissaataa)*

Avatangiisinik mingutsitsineq akitsuusiinermi akileraarusiinermilu isiginiarneqarsinnaaqqullugu ungasinnerusooq isigalugu akitsuutit akileraarutillu naapertuunnerusumik angissuseqaler-

sinnissaat siunertaasoq ataatsimiititaliamit maluginiarneqarpoq.

### **Siunnersuutip aningaasaqarnikkut kingunerisassai**

Siunnersuutip piviusunngortinneqarnerani aningaasaqarnikkut kingunerisassat siunnersuummut nalinginnaasumik nassuiaatini nassuiaatigineqarput. Tassani allassimavoq; akitsuummik akileraarummillu akiliisitsisoqanngikkaluartoq biilit innaallagissamik ingerlatillit taamaallaat 12-it Kalaallit Nunaannut eqqussorneqarsimasut. Biilnik brintimik ingerlatilinnik eqqussisoqarsimanngitsoq. Taamaammallu eqqussuinermi akitsuutininik qamutillu motoorillit akileraarutaannik, piffissami 1. januar 2018 tikillugu isertitassatigut annaaneqartussat siunnersuutip kingunerisaanik amerlanngitsuinnaassangatineqartut.

### **Ataatsimiititaliap inassuteqaataa**

Ataatsimiititaliap paasinninnera malillugu siullermeerinermi Naalakkersuisup tamanna pillugu saqqummiussinerata kingorna biilit hybridimik ingerlatillit siunnersuummut aamma ilaatinneqarnissaat kissaatigineqarpoq.

Tamatumunnga tapersiinini ataatsimiititaliap oqaatigissavaa inassutigalugulu kissaammik tamatuminnga malinnittumik Naalakkersuisut aappassaaneerinissamut allannguutissatut siunnersuummik saqqummiussissasut.

Ataatsimiititaliap tamanna pillugu inassuteqaataa naapertorlugu Naalakkersuisut allannguutissatut siunnersuuteqareerneranni siunnersuut akuerineqassasoq **ataatsimiititaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Finn Karlsen, Siulittaasoq

---

Gerhardt Petersen

---

Evelyn Frederiksen

---

Jens Immanuelson

---

Naaja Nathanielsen

---

Hans Aronsen

---

Kalistat Lund